

San Pedro jo'e chũ'o tocha saosi'ea'me

Chũ'o saosi'ea'me

¹ Chũ'ũ, Simón Pedro, Jesucristo'te cho'ochẽ cho'okaiũ Repaũ saosi'kupi ija'ova utija'ova jo'e tocha saomũ mũsanũkonare, chũkũna cuasacheja'che Repaũ'te re'oja'che cuasajũ pa'inare. Dios mai Cuasakũ maire vati toa sani uuche Ɔsekaikũji Jesucristo Re'okũjekũ mũsanũkonare jã'aja'ñe cuasache jo'kasi'kũa'mũ.

² Maire Paakũ Jesucristo pa'ichena'me Dios pa'iche masinajejũ Ɔcuauji re'oja'che pa'iche karama'ñe cho'okaiũna re'oja'che pa'ijũ'ũ.

Dioni cuasajũ re'oja'che pa'iche'me

³ Dios peore Cho'omasijekũ peore Paakũ Re'okũjekũ maire chẽa paakũ Repaũ pa'iche'te masia'jũ chini kũakũ'mũ. Ɔcuachi'a maipi Repaũni masi cuasajũ re'oja'chere cho'ojũ paapũ chini maire karache peore ĩsimũ Repaũ.

⁴ Jã'aja'ñe Pa'ikũjekũ maire Repaũ, "Rũa re'oja'chere cho'okaija'mũ chũ'ũ", chiisi'e cho'okaimũ Repaũ, maipi rekoñoã re'ojarekoñoãre paajũ Repaũ pa'icheja'che re'oja'che pa'imasijũ, jũvomasijũ Repaũ'te cuasamana Ɔcuauache cu'ache cho'ochẽ'te ña chẽa Ɔcuaja'che cho'omaneajũ chini.

5 Jã'ajekuna Repauni cuasaju peore cho'ore'ochetu'ka cho'ojũ, ñamema'ñe re'oja'che cho'ochete che'chejũ'ũ. Re'oja'chere cho'ojũ pa'imasiche'te che'chejũ'ũ.

6 Pa'imasiju cu'a jũvomasiche'te che'chejũ'ũ. Cu'ache cho'ochete jũvomasiju cu'ache ti'jñetojẽ'e ũcua Diore cuasaju pojojũ pa'ijũ'ũ. Jã'aja'ñe pa'iju Diore masi cuasaju pojoche'te che'chejũ'ũ.

7 Ũcuachi'a mũsanũkona majapãijanare cuasaju pãi ũcuauũkore oiju pa'ijũ'ũ.

8 Mũsanũkonapi jã'aja'ñe pa'iju si'arũmũ na'a rũa re'oja'che pa'iche'te che'chejũ pa'ito chekuna mũsanũkona pa'iche re'oja'chere ña chẽajanaa'me, mũsanũkonapi Maire Paakuni Jesucristoni cuasate'emapũna.

9 Jã'aja'ñe cho'omanata'ni Dioni masi cuasavesũjũ repauna cu'ache cho'osi'e Dios tũnosũkaisi'e cavesusũsinajejũ na'ava'na pa'icheja'che pa'ime.

10 Jã'ajekuna, chu'ũ majapãijana, mũsanũkonani Diopi chẽa paakuna si'arũmũ na'a re'oja'che pa'iju Repaũ neena pa'iche cho'o ñojũ'ũ. Jã'aja'ñe cho'ojũ pani jmamakarũjẽ'e cacu'amanajanaa'me mũsanũkona.

11 Ũcuachi'a mũsanũkonare Dios Repaũ pa'icheja si'amacheja kakache ũsema'ñe rũa pojokũ cuaaja'mũ, Maire Paakũ Jesucristo maire vati toa sani uuche ũsekaikũ chũ'ũkũ pa'icheja.

12 Jã'ajekuna chu'ũ mũsanũkonare repare cavesũmanea'jũ chini peore cuasakũ si'arũmũ kuakũ pa'ija'mũ, mũsanũkonare che'chosi'e

chũ'o ũcuarepare masijũ re'oja'che cho'ojũ pa'inareta'ni.

13 Chũ'u vajũũ pa'irũmũjatũ'ka jã'aja'ñe chũ'vakũ pasa chiimũ chũ'u, mũsanũkonapi repare cuhama'ñe cuasajũ paarũ chini.

14 Maire Paakũ Jesucristoji kũaũna chũ'u jma-makarũ pani jũnisõjañe masimũ chũ'u.

15 Jã'ata'ni chũ'ũre peore cho'ore'ochetũ'ka che'choja'mũ chũ'u, mũsanũkonapi chũ'u jũnisõsirũmũjẽ'e ũcua cuasajũ paarũ chini.

Jesucristo Peore Masiũ re'oja'che ñokũna ñasi'ere kũamũ

16 Chũkũna mũsanũkonare Maire Paakũ Jesucristo masichena'me Repaũ jo'e raijache che'chosi'e rupũ aichũ'o kũamasinapi cuasa kũarena asa kũasi'ema'mũ. Chũkũnapi ñasinaa'me Repaũ pa'iche, Ũcuauji Repaũ pãĩ chũ'ũkũ pa'iche'te rũa re'oja'che ñokũna.

17-18 Chũkũna reparũmũ Maire Paakũna'me aikũti Dios pa'ikũtire mũni pa'ijũ Repaũ'te Jesure re'oja'che ñokũ'te ñajũ Repaũ pãĩ chũ'ũkũ pa'iche'te kũa jũnaukũ cũnaũmũpi mai Ja'kũ Dios Peore Paakũ Re'okũ i'kachũ'o ija'che chiiche'te asasinaa'me: "Ikũ chũ'u chũia'mũ. Chũ'u rũa oiũ pojokũ'mũ ikũ", chiisi'kũamũ Dios.

19 Mũsanũkona Dios chũ'o kũasina aperũmũ tocha jo'kasi'e kũachũ'o ũcuarepa asamasijũ cuasame. Chura chũkũna kũasi'ere asa na'a masi cuasajũ'ũ. Ija'chea'me: Nami chijacheja ƣorũji si'añami miakũna jo'e apeñatatojatũ'ka re'oja'che pa'ire'omũ. Ũcuaja'che Dios chũ'ũñe

asa chëa cho'ojũ pani Repaũ jo'e raiumucuse-jatũ'ka re'oja'che pa'ijanaa'me m̃sanũkona.

20-21 Iere masijũ'ũ: Dios chũ'o kũasina kũajũ tocha jo'kasi'e Dios chũ'o pa'ikorovũ repanachi'a cuasajũ tochasi'epi pa'ima'mũ. Jmamakaruẽ'e repana cuasache i'kamapũ Dios Rekocho chũ'ũñechi'a kũajũ Repaũ chũ'o masi kũaasome repana. Jã'ajekũna repana tocha jo'kasi'e Dios chũ'ojekũ pãi repanare ũache cuasajũ kũacu'amũ.

2

Jorechũ'o che'chona pa'iche'te kũamũ

¹ Aperũmũ pa'isinare Israelpãi kuanupũ Dios chũ'o kũanapi pa'ijũna ũcuachi'a jorechũ'o che'chona paniasome, “Dios chũ'o kũanaa'me chũkũna”, chiijũ jorechũ'o che'chona. Irũmũ ũcuaja'che jorechũ'o che'chona rani m̃sanũkonana'me pa'ijanaa'me. Maire Paakũ jũni ro'ikaisi'ere jachajũ m̃sanũkonani cacũ'oũu chini jorechũ'o jmanũkorũãchi'a che'chojũ teana cho'osõjanaa'me repana.

² Repana cu'ache cho'ojũ pa'iche'te Jesure cuasanapi jainũko ña chëa repana pa'icheja'che pa'ijũna chekũna pãi repana pa'iche'te ña cu'ache cutujanaa'me. Ũcuarepare, “Dios chũ'o cuasache cu'amũ”, chiijanaa'me.

³ Repana jorechũ'o che'chona kurineenajejũ m̃sanũkonarejẽ'e cuasama'ñe rupũ repanare ũachechi'a jñaaũu chini cho'ojũ cu'ache che'chojanaa'me. Jã'ata'ni repana cu'ache cho'osi'e ro'i tã'tachejẽ'e peoche rũa cu'ache

ti'jñeja'mu repanare, aperumu Dios, "Pai cu'ache cho'onare ija'che cho'oja'mu chu'u", chiisi'epi.

4 Aperumu Dios angeleva'nare Repau'te jachaju cho'osi'e cu'a tunoma'ne ucua cuasaku vati toana rua chijachejana sejoasomu, pai ucuanuko cho'osi'e Repau chũ'urumujatu'ka, quẽo suosiva'naja'ne paapu chini.

5 Ucuachi'a aperumu Noe reparumu pa'isinare chu'vasi'eta'ni repanapi jachajuna repana cu'ache cho'osi'e tunoma'ne ucua cuasaku oko rua ra cheja peore ko'sa timusõne chũ'uasomu Dios, cu'anapi peore cho'osõa'ju chini. Noere re'oja'che pa'iche chu'vakutechi'a te'eute jũ'iñe ñseku, chekunare sieterepanare ucuchi'a ñseasomu Repau.

6 Ucuachi'a aperumu pa'isinare Sodoma vñ'ejoopona'me Gomorra vñ'ejoopo pa'isinare uusõne'te chũ'uasomu Dios, repajoopoãpi peore ñhacutapoãchi'a uusõa'ku chini. Na'a pa'isirumu pa'iju cu'ache cho'ojanapi repajoopoã pa'inare cu'ache ti'jñesi'ere asa kuku repana cu'ache cho'oche'te ñhasõ re'oja'che pa'iche'te che'cheju paapu chini jã'aja'ne cho'oasomu Dios.

7 Jã'ata'ni reparumu Lotechi'a uumanea'ku chini etoasomu Dios, re'oja'che pa'iu repana cu'ache cho'oche ñaku oiũ pa'isi'kure.

8 Repau Lot re'oja'che pa'ikuji pai cu'ache pa'inani ja'me pa'iu repau rekocho re'oja'che cuasakujeku repanapi si'arumu cu'ache cho'ojuna ñaku ucuchi'a asaku rua oiũ paniasomu repau rekocho.

9 Jã'are cuasaju iere masime mai: Dios Repau neenare cu'ache ti'jñeto ùsekaimasiche. Ûcuachi'a cu'ache pa'inare Repau pãi ùcuanuko cho'osi'e ro'iche chũ'urumujatu'ka chëa vati toa sao paamasiche masime mai.

10 Pãi tiiñe cuasaju repanare uachechi'a cho'onana'me Maire Paaku chũ'uñe cuheju jachanare na'a rua cu'ache chũ'uja'mu Repau. Repana cuasaju pa'iche rua i'kaju cunaumure pa'iju peore chũ'unare ñomanarejẽ'e cuasa, kukuma'ñe cu'ache cutunaa'me repana.

11 Jã'ata'ni ángeles na'a rua koka paaju na'a rua masinata'ni Dios asaku'te jã'aja'ñe cu'ache i'kama'ñe ña, kukume repanare jorechu'o che'chonare.

12 Repana jorechu'o che'chona pa'ivesuju repanare uachechi'a cho'uju cuasavesuju cu'ava'na pa'icheja'che pa'inaa'me. Repana ñamamajñarũãna'me ñamanare cu'ache i'kaju, cu'ava'na chëa vanisõcojñoñeja'ñe cho'osõjanaa'me repana.

13 Repanare uache cho'orumu pojoju cu'ache cho'ochejẽ'e cuasama'ñe cho'osi'e ro'i chekunare repana cu'ache cho'osi'ejache cho'ocojñojanaa'me. Musanukona chi'i sãiñechi'a pojoju ãu ãirumu ja'me chi'i vajuchuache ñoñe repanare uache rua tiiñe cho'uju jorenaa'me repana.

14 Romio'te te'eo'terejẽ'e uache ñama'ñe pa'imaru rua cu'ache cho'onata'ni ca'namanaa'me repana. Dioni apucasaju re'oja'che cho'o koka peova'nare jorejũ cu'ache che'choju cacu'onaa'me repana. Cu'achechi'a

cho'onajeju kuri chii ainaa'me repana. Repana cu'ache ro'i Dios toana saoja'mu repanare.

15 Ma'a rühiñe saima'a saicuheju tiiima'ana sani cavesusinaja'ñe re'oja'che pa'iche ühasõ cu'ache pa'inaa'me repana. Beor mamaku Balaam kurire koorra chini cu'ache cho'osi'aja'che cho'onaa'me repana.

16 Repau'te Balaamre cu'ache cho'ora chini saikuni burrava'o chu'o i'kamava'ota'ni repau tiiñe cho'ojasa chini saiche'te üseko pãi chu'opi i'kako ke'reko'teta'ni jachaasomu.

17 Repana jorechu'o che'chona oko puni oko raimana pa'icheja'che pa'iju oko rara chini rama'ñe tuta saocheja'che jorenajeju vati toa rua chijachejare ai sani pa'ijanaa'me.

18 “Rua masime chukuna”, chiiju peoche i'kaju cu'ache cho'ochu ühasõ aperepa re'oja'che pa'inare joreju cu'ache che'choju, “Ücuauache cho'ore'omu”, chiiju cacu'ome repana.

19 “Chukuna che'choche'te asa chëa musanukonare uache cho'ojü pani re'oja'che pa'ijanaa'me”, chiiju jorenaa'me repana. Jã'ata'ni repanapi re'oja'che cho'oñu chiito cu'achechi'a cho'omasinajeju cho'ocu'aku'mu repanare. Pãi ücuauko chëa paacojñonaja'ñechi'a pa'iju repana si'arumu cho'ojü pa'iche ühasõuanareta'ni ühacu'amü, cho'ojü che'chesõrena.

20 Cu'ache pa'isinapi Maire Paakuni Jesucristoni vati toa sani uuche Üsekaikuni cuasaju jovo Ücuauji cho'okaiuna Repau'te cuasamana cuasacheja'che cuasaju cu'ache

cho'ochete ũhasõ re'oja'che cho'oju pa'isinapi cavesusõ jo'e cu'ache cho'oju pa'ito aperumũ pa'isi'e na'a rua cu'aja'mũ repanare.

²¹ Dioni cuasamarũ re'oja'che pa'imanare rua cu'amũ. Jã'ata'ni Jesure jovosinapi Repaũ chũ'uñe jachaju Repaũ'te cuasache jo'kasõsinare na'a rua cu'aja'mũ.

²² Jã'aja'ñe cho'ona ija'che chiicheja'che pa'ime: "Jamuchai repaũ sisosi'e jo'e ãimũ. Jo'chasẽse cuchasina cha'ophanarũna teana ũme si'si cho'osõme", chiicheja'che pa'ime.

3

Maire Paaku jo'e rajachere kũamũ

¹ Asarepajũ'u, chũ'u majapãijana. Ija'ova utija'ova jo'e tocha saomũ chũ'u mũsanũkonare chũ'u chũ'vakũ ka'chañoã tocha saochũ'ore mũsanũkonapi cavesũma'ñe rũhiñe cuasaju paarũ chini.

² Cavesũma'ñe pa'iju aperumũ Dios chũ'o kũasina tocha jo'kasi'e cuasaju pa'ijũ'u. Ũcuachi'a chũkũna Repaũ saosina Maire Paaku vati toa sani uuche Ũsekaikujĩ chũ'ũna mũsanũkonare che'chosi'e cavesũma'ñe cuasaju pa'ijũ'u.

³ Ie ũcuachi'a cuasajũ'u: Chuta'a Jesús jo'e raimarumũ pãĩ repanare ũachechi'a cuasaju cu'ache cho'oju pa'ina rani pãisojanaa'me mũsanũkonare.

⁴ Ija'che i'kajanaa'me repana: "¿Je'se pa'ũna Cristo, 'Jo'e rajaja'mũ chũ'u', chiisi'kuta'ni raima'kũ? Repaũ'te jovo mai ja'kupãija'ñe

pa'ijũ maire che'chojũ pa'isina peore jũnisõcuhasinaa'me. Jã'ata'ni cheja pa'iche mamarũmũpi sañoma'ñe ũcuate'e pa'imũ. Raimanejacosomũ Repaũ", chiijanaa'me.

5 Repana jorena mamarũmũ cho'osi'ere cuasacuhejũ jã'aja'ñe i'kame. Jã'ata'ni Diopi chũ'ukũna cheja pa'iche te'eñoã sa'ñekũ pa'imũ. Aperũmũ Diopi i'kaũna cũnaũmũ peosiumũpi paniasomũ. Ũcuachi'a Repaũji i'kaũna okochi'a pa'isi'e cheja paniasomũ. Po'ona'me chiaraã chiañaã paau chini jã'aja'ñe cho'oasomũ Repaũ.

6 Ũcuachi'a na'a pa'isirũmũ okopi rũa ra, chejare peore ko'sa timũna cheja pa'iche peore cho'osõasomũ.

7 Chura pa'iche cũnaũmũna'me cheja pãi ũcuauko cho'osi'e Dios cuasa cu'ache cho'osinare vati toa saoumucusena Ũcuauji chũ'ũna peore uu sañosõja'mũ.

8 Ũcuachi'a, chũ'ũ majapãijana, ie cavesuma'ñe cuasajũ pa'ijũ'ũ: Maire Paakũ cuasato te'eumucuse milrepaũsurũmũja'ñeasomũ. Ũcuachi'a milrepaũsurũmũ te'eumucuseja'cheasomũ Repaũ'te.

9 Pãi te'ena cuasato Maire Paakũ Repaũ, "Jo'e raija'mũ chũ'ũ", chiisi'e na'mi rairũja'chere raimanesi'kũa'mũ. "Churajẽ'e rũa jeerũmũta'ni rairũja'chere raimanecuhamũ Repaũ", chiime. Jã'ata'ni Repaũ'te raire'oumucusepi caranisõũna raima'ñe pa'ima'mũ Repaũ. Rurũ maini oiũ Repaũ'te jovojanapi repaũna cu'ache cho'ochete ũhasõ Repaũni cuasajũ jovo te'eũjẽ'e

cho'osōmanea'jũ chini cha'akũ raimañe pa'imũ Repaũ.

10 Maire Paakũ jo'e raiumucuse teana tĩ'aja'mũ. Ñaañi pẽ'jeju raimaũna cha'ate'e pãĩ pẽ'jemaumucusena ñaaũ raicheja'che Maire Paakũ ũcuaja'che Repaũ'te pẽ'jemaumucusena raija'mũ. Reparũmũ cũnaũmũ pa'iche rũa vajuçhũache asoche peore uu ñañasõja'mũ. Cheja ũcuachi'a repacheja pa'ichena'me peore uu sañosõja'mũ Diopi chũ'ũna.

11 Peore jã'aja'ñe ñañasõjañejekũna asa kũkũ cu'ache cho'ochẽ peore ũhasõ Repaũni masi cuasaju pojoju pa'ijũ'ũ musanũkona.

12 Musanũkonare peore cho'ore'ochetũ'ka re'oja'chere cho'ojũ Dios Repaũ masiche peore cho'o ñoumucusere cha'aju pa'ijũ'ũ, na'a na'mi raau chini. Repaumucuse cũnaũmũ uu ñañasõja'mũ. Cu'amajñaruãta'ni toari peore uu ko'sisõja'mũ.

13 Maita'ni Dios, "Ija'che cho'oja'mũ chũ'ũ", chiisichejñare cheja mamachejana'me cũnaũmũ mamaũmũre cha'aju pa'ime, re'onachi'a pa'iju re'oja'chechi'a cho'ojachejñare.

14 Jã'ajekũna, chũ'ũ majarpãijana, jã'are cha'aju peore cho'ore'ochetũ'ka Repaũna'me re'oja'che pa'iju, re'oja'chere cuasaju cu'ache peona pa'ijũ'ũ, Diopi re'oja'che pa'inani rani ñaa'kũ.

15 Maire Paakũ maini oiũ vati toa sani uuche'te Ësekũ maipi Repaũni jovo Ũcuauña'me si'arũmũ paaru chini cha'ache cavesũma'ñe cuasajũ'ũ. Mai majarpãijaja'iu mai rũa cuasakũ Pablo

ũcuachi'a Diopi cho'okaiuna masiku ũcuate'ere kuaku tocha saosi'kua'mu musanukonare.

¹⁶ Repau Pablo tocha saosija'o si'aja'o jã'are kuamu. Jã'ata'ni repaja'o tochasi'e te'emajñaruã asavesache kuaku tochasi'ea'me. Jã'ajekuna Diore masi cuasamana repare asavesaju cheke Dios chu'o tochasi'e che'chocheja'che repana cuasachechi'a tiiñe che'chome. Jã'aja'ñe repana cuasachechi'a che'choju masi kuamanesi'e ro'i cho'osojanaa'me repana.

¹⁷ Jã'ajekuna, chu'u majapãijana, musanukona chuta'a repana raimarumu asasinajeju ñarepaju pa'ijũ'u, re'oja'che pa'iche'te repanapi rani jorechu'ore che'chojuna asa chãa cuasaju cacu'ocojñoñe.

¹⁸ Ũcua re'oja'che pa'iju Maire Paaku vati toa sani uuche Æsekaiku Jesucristo pa'iche'te na'a rua che'cheju si'arumu Repauni na'a rua cuasaju pa'ijũ'u. Irumupi ai si'arumu pojocojñooku paau Repau. Jã'aja'ñe paau. Re'omu.

Pedro

Koreguaje

Koreguaje: Dios Chu'o Kuaphuro New Testament

copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source files dated 1 May 2025

87a345ac-83c6-51ad-8750-17a703f38bcc